

Wassen Krach drauße

Omm Stommdisch omm letzde Sunndaach hott uff oomol de Schorsch gesaad: Heit moie habb isch schunn in aller Herrgottsfrieh dess Fensder vunn unserne Schloofstubb zugemacht, wassen Krach drauße, ich konnden nimmi heern.

Ja, seet de Karl, dess mett dene Fluchzeuche iss werklisch ferrschderlich. Awwer Schorsch, heit sinn die doch garnitt iwver uns geflooehe?

Naa, seet de Schorsch, dess warn joo aach nitt die Fluchzeuche, dess warn die Dauwe, besser gesaad die Ringeldauwe im Äbelboom vumm Nochber. Dess misse su zwaa dicke Dauberde gewese soi, dene Stimme nooch, die hawwe sisch geescheseidisch iwverbierte wolle. Wenn der oone uffgeheerd hott, hott de onner oogefonge. E gons Stunn long hawwe die geruuckserd, jeder wollt de Bessde soi – unn um was isses wider gonge? Um die Weibscher.

Isch saach: So sinn merr halt, mir Männer.

Moont de Karl: Isch habb noch nie geruuckserd.

No ja, seet de Schorsch, awwer irschendwie hott doch jeder von uns sisch schunn emol uffgeplustert, weiler Oidruck bei de Weiwer schinne wollt.

Frieher, seet de Karl, schunn long nimmi.

Losse merr dess, habb isch gesaad, mir haddes vunn de Dauwe. Bei dene isses halt su, dass die joo e paar Mol im Johr ihr Nester baue, Noochwuchs krieh unn den dann aach noch uffzieh misse. Doo isses gons klar, dass die Weibscher sisch ihr Männscher ausuche. Die wisse, wer omm lautsde ruuckserd, der iss aach stark genuch, beim Fiddern nitt die Flatter ze mache.

Doo seet de Schorsch: Die Dauwe heert merr, die Ringeldauwe unn aach die Türkedauwe. Awwer was merr nimmi heert, sinn onnern Veeschel. Doo denk isch gons besonners onn die Omsele, weils vunn dene nimmi su vill gewwe dut wie noch vor e paar Johr. Dene ihr Junge werrn vunn de Katze gefresse, unn wennse werklisch gruß werrn kriehense su enn Virus unn iwverlewe den nitt.

Doo hosde recht, saach isch, awwer weil dus vunn dene Dauwe host. Isch habb su gern die Turteldauwe geheerd, onn dene hadd isch immer moin Spaß, drauße in de Näh vunn de Wissemiehl hosde die immer heern kenne, jetz schunn e paar Johr nimmi.

De Karl hott geniggd. Unn aach de Pirol heersde nimmi, aach die Feldhinkel unn die Fasane werrn immer wenischer. Unn doo iss noch ooner, der dut merr awwer im Aacheblig nitt oifalle. In de Nadur drauße werrds still, nor die Fluchzeuche werrn immer lauder. Iss dess nitt schlimm?

Ja, saach isch, dess iss schlimm. Awwer was reesche merr uns uff, weil wer will die Veeschel eischendlich noch heern? Die bestimmt nitt, die mett dene Stegger im Ohr uff de Gass erum laafe unn was waaß isch ferr Musik heern, wennse nitt grad dess abheern was uff ihr Ei-Fon-Ding druffgebabbeld worrn iss.

Ach, rieft de Karl, jetz isser merr oigefalle, de Voochel, den merr aach nimmi heern dut, de Kuckuck isses.

De Schorsch hott gegrinst: Den habb isch awwer die vorsch Woch geheerd.

Ei wo donn?, frächt de Karl.

Doo grinst de Schorsch noch mieh: Bei moim Bub, der hott nämlich e Kuckucksuhr.

Eiern Honnes